

BOSNA I HERCEGOVINA
FEDERACIJA BOSNE I HERCEGOVINE
Fond za zaštitu okoliša Federacije Bosne i Hercegovine
SARAJEVO

P R A V I L N I K

**O POSTUPKU OBJAVLJIVANJA KONKURSA I O ODLUČIVANJU O ODABIRU
KORISNIKA SREDSTAVA FONDA ZA ZAŠTITU OKOLIŠA FEDERACIJE
BOSNE I HERCEGOVINE**

Sarajevo, mart / ožujak 2010. godine

Na osnovu člana 27. stava 4. Zakona o Fondu za zaštitu okoliša Federacije Bosne i Hercegovine („Službene novine Federacije BiH“, broj: 33/03), i člana 44. stav 3. Statuta Fonda za zaštitu okoliša Federacije Bosne i Hercegovine („Službene novine Federacije BiH“, broj: 33/06), Upravni odbor Fonda za zaštitu okoliša Federacije Bosne i Hercegovine, na prijedlog direktora Fonda i uz saglasnost Federalnog ministarstva turizma i okoliša, na sjednici održanoj dana 11. marta 2010. godine, donio je:

P R A V I L N I K
O POSTUPKU OBJAVLJIVANJA KONKURSA I O ODLUČIVANJU O ODABIRU
KORISNIKA SREDSTAVA FONDA ZA ZAŠTITU OKOLIŠA FEDERACIJE
BOSNE I HERCEGOVINE

Član 1.

Ovim Pravilnikom uređuje se postupak objavljivanja konkursa i odlučivanja o odabiru pravnih i fizičkih osoba kojima Fond za zaštitu okoliša Federacije Bosne i Hercegovine (u daljem tekstu: Fond), u okviru Zakonom propisane djelatnosti Fonda, odobrava finansijska sredstva za provedbu programa, projekata i drugih aktivnosti u području zaštite okoliša (u daljem tekstu: korisnici sredstava).

Član 2.

Fond odobrava finansijska sredstva za finansiranje programa i projekata zaštite okoliša na temelju javnog konkursa, osim kad je zakonom propisano da Fond neće raspisati javni konkurs.

U smislu ovog Pravilnika, javnim konkursom se smatraju i poziv, te oglas za javno prikupljanje ponuda.

Član 3.

Javni konkurs se raspisuje za projekte i programe u području zaštite okoliša, te za projekte i programe u području korištenja obnovljivih izvora energije.

Upravni odbor Fonda može odlučivati da se javni konkurs za obje vrste projekata i programa, iz stave 1. ovog člana, objave zajedno.

Član 4.

Javni konkurs može obuhvatiti cjelinu programa područja zaštite okoliša, odnosno korištenje obnovljivih izvora energije, ili samo za određene programe u tim područjima iz člana 26. stav 1. Zakona o Fondu za zaštitu okoliša Federacije Bosne i Hercegovine.

Član 5.

Fond objavljuje javni konkurs, u pravilu najmanje jednom u kalendarskoj godini, u skladu sa programom rada i finansijskim planom Fonda.

Ako se na temelju prihvaćenih prijava ne iskoriste sva finansijska sredstva planirana za programe i projekte utvrđene javnim konkursom, može se tokom godine za istu namjenu raspisati novi javni konkurs.

Odluku o raspisivanju javnog konkursa donosi Upravni odbor Fonda, na prijedlog direktora Fonda.

Član 6.

Javni konkurs za korištenje sredstava Fonda, objavljuje se u "Službenim novinama Federacije BiH", na službenim web stranicama Fonda, odnosno Federalnog ministarstva okoliša i turizma, te u najmanje dva dnevna lista koja se distribuiraju na području cijele Federacije Bosne i Hercegovine.

Teskt javnog konkursa sadrži:

1. predmet javnog konkursa,
2. korisnike sredstava koji imaju pravo na podnošenje prijave,
3. uslove kojima podnositelji prijave moraju udovoljavati,
4. popis dokumenata koje je potrebno priložiti uz prijavu,
5. osnovne kriterije odabira,
6. mjesto i rok za dostavu prijave,
7. rok za donošenje odluke o odabiru.

Član 7.

Rok za podnošenje prijava na javni konkurs ne može biti kraći od 15 dana ni duži od 60 dana.

Član 8.

Radi pripreme i obrade prijava na javni konkurs, direktor Fonda može osnovati komisiju.

Komisija, na temelju obrade prijava, izrađuje izvještaje o provedenom javnom konkursu te daje stručnu ocjenu za prijedlog odabira prijava koje će se prihvatiti. Stručnom ocjenom komisije, utvrđuju se prioriteti u odabiru pristiglih ponuda.

Izvještaj o provedenom javnom konkursu i stručnu ocjenu, komisija dostavlja direktoru Fonda.

Član 9.

Direktor može osnovati Komisiju za prigovore koja će, po završenoj proceduri dodjele sredstava Fonda, razmatrati eventualne prigovore korisnika sredstava Fonda.

Član 10.

Odluku o prihvatanju projekata, programa i drugih aktivnosti za koje se dodjeljuju sredstva Fonda po podnesenim prijavama na javni konkurs, donosi Upravni odbor Fonda na prijedlog direktora Fonda.

Odlukom iz stava 1. ovog člana, Upravni odbor će odlučiti o odabiru korisnika sredstava Fonda po objavljenom javnom konkursu.

Član 11.

Fond će sve sudionike javnog konkursa obavijestiti o odluci Upravnog odbora Fonda o odabiru korisnika sredstava Fonda po objavljenom javnom konkursu, u roku od 15 dana od donošenja odluke.

Fond će objaviti odluku Upravnog odbora Fonda i na službenim web stranicama Fonda.

Član 12.

Protiv odluke Upravnog odbora Fonda o odabiru korisnika sredstava Fonda po objavljenom javnom konkursu, učesnik konkursa može podnijeti prigovor Komisiji Fonda u roku od tri (3) dana od prijema pisane odluke.

Prigovorom se može tražiti preispitivanje provedene procedure u smislu eventualnih propusta u ocjeni prijave korisnika sredstava od strane imenovane komisije, koja će biti formirana za prigovore.

Ako Upravni odbor Fonda uvaži prigovor, novu će odluku dostaviti svim učesnicima javnog konkursa.

Odluka Upravnog odbora Fonda donešena o prigovoru, je konačna.

Član 13.

Na temelju konačne odluke Upravnog odbora, Fond sa korisnikom sredstava Fonda sklapa ugovor o korištenju sredstava Fonda.

Ugovorom iz stave 1. ovog člana, uređuje se iznos odobrenih sredstava Fonda i dinamika njihove dodjele, uslovi i način korištenja dodijeljenih sredstava, način praćenja namjenskog korištenja dodijeljenih sredstava, te ostala međusobna prava i obaveze korisnika sredstava i Fonda.

Član 14.

Fond neće raspisati javni konkurs, kad kao ugovorna strana neposredno sufinansira i sudjeluje u realizaciji programa, projekata i sličnih aktivnosti u području zaštite okoliša koje organiziraju i finansiraju međunarodne finansijske institucije i organizacije.

Član 15.

Ovaj Pravilnik stupa na snagu danom objavljivanja u "Službenim novinama Federacije BiH".

PREDSJEDNIK
UPRAVNOG ODBORA
Mr. Pero M. Goluža, dipl.ing.

Broj: 12/05-2-2010.
Sarajevo, 11. mart/ožujak 2010. godine